



TIBBIYOTNOMA

TOSHKENT TIBBIYOT AKADEMIYASI NASHRI

№ 3 2025-YIL 25-MART



YANGILANISH, YASHARISH BAYRAMI MUBORAK BO'LSIN!

Go'zal diyorumizga barchamiz orziqib kutgan – Navro'zi olam kirib keldi. Navro'z – yangi kun demakdir. Uyg'onish va yangilanish ayyomi – Navro'z shukuhidan dillarimiz yayramoqda.

Navro'zni yurtimizga farovonlik, tinchlik, omonlik elchisi sifatida tashrif buyurayotgan qadr-qimmat, xayru saxovat, mehr-oqibat farishtasiga qiyoslash mumkin.

Aytish joizki, Navro'z o'zaro qadr-qimmat, xayru saxovat, mehr-oqibat timsolidir. Ezgulik, saxovatga yo'g'rilgan uyg'onish, yasharish ayyomi bu yil dillarimizni yana quvonch-shodlikka chulg'adi.

Fursatdan foydalanib shunday tarovatli kunlarda barchangizni, ko'p millatli xalqimizni, hurmatli

o'qituvchi-professorlar va talaba-yoshlarni Navro'z ayyomi bilan chin dildan qutlayman. Sizlarga avvalo sog'lik-omonlik, oilalaringizga tinchlik-xotirjamlik, baxt-saodat tilayman. Ilmiy izlanishlaringiz va o'qishlaringizda omad yor bo'lsin. Navro'zi olamning hayotbaxsh nur-ziyosi qalbingizni poklab, nurafshon aylasin.

Barchangizga Vatanimiz ravnaqi yo'lidagi mas'uliyatli va sharaflil faoliyatingizda ulkan muvaffaqiyatlar tilayman! Har bir xonadonga yangidan yangi rejalar, maqsadlarning qaror topishidek tole nasib etsin. Navro'z shukuhi doimo qalblarimizni quvonchlarga to'ldirib, yurtimizda mangu qolsin!

Shuhrat BOYMURADOV,
Toshkent tibbiyot
akademiyasi rektori v.v.b

YANGI KUN – NAVRO'Z MUBORAK!

«Navro'z» iborasi asli forscha so'z bo'lib, «Yangi kun» degan ma'noni ifodalaydi. Tarixdan ma'lumki, Ahmad Yugnakiy, Yusuf Xos Hojiblar ham o'zlarining qimmatli manbalarida Navro'zi olam haqida noyob fikrlarni keltirib o'tganlar. Darhaqiqat, jannatmakon diyorumizda bahor, go'dakdek ma'sum, onadek mehribon, otadek saxovatli, singildek munisa...

Yangilanayotgan O'zbekistonga ko'klamning ifori kelib tog'u tosh, bog'u rog', hattoki buyuk bobo-momolarimizni bag'riga olib, allalab yotgan ko'hna qabrlar ustida ham giyohlar omonatgina tebranishmoqda.

Navro'z bayramida ommaviy xalq sayillari uyushtirilgan, yangi unib chiqqan ko'katlardan, bahoriy taomlar: sumalak, halim, ko'k somsa, ko'k chuchvara kabi taniq taomlar pishirilgan. O'zbekistonda mustaqillikka erishilganidan keyin boshqa qadriyatlar qatori Navro'z bayrami ham qayta tiklandi. U hozir mamlakatimizda umumxalq bayrami sifatida keng nishonlanmoqda. Har yili mamlakatimizdagi barcha shahar va qishloqlarda bayram sayillari, tomoshalar, boshqa bayram tadbirlari o'tkazilyapti, xayriya tashkilotlari yordamida mehribonlik uylari tarbiyalanuvchilari, urush va mehnat faxriylari, yolg'iz keksalar, nogironlar holidan xabar olinmoqda, ularni bayram bilan qutlab, turli sovg'alar, xayr-ehsonlar taqdim etilmoqda.

(Davomi 2-betda)



Yasharish faslining debochasi, tenglik va hamjihatlik ayyomi muborak!



“Talabalik bahori – 2025”

NAVRO‘ZI OLAM – YASHARISH AYYOMI YANGILANISH FASLIDA BAHOR TAROVATI



Toshkent tibbiyot akademiyasida 2025-yilgi Navro‘z umumxalq bayrami «Qadriyatlar boqiy bo‘lsin, Navro‘z!» degan bosh g‘oya asosida umumxalq sayillari keng nishonlandi.

Bu yilgi Navro‘z bayrami muqaddas Ramazon oyida nishonlanishini inobatga olib, keksa avlod vakillarini, xususan, Ikkinchi jahon urushi qatnashchilari va mehnat fronti faxriylarini har tomonlama e‘zozlash, «Mehribonlik», «Saxovat» va «Muruvvat» uylarida yashayotganlar, ijtimoiy himoya daftalariga kiritilgan va ko‘makka muhtoj insonlarning holidan xabar olish, ular uchun bayram dasturxonini yozish hamda turli xayriya tadbirlari o‘tkazildi.

Bayram arafasida Akademiya hududida «Yashil makon» umummilliy loyihasi doirasida obodonlashtirish va ko‘kalamzorlashtirish ishlari amalga oshirildi. Navro‘z umumxalq bayramida millatlararo do‘stlik va totuvlik muhitini mustahkamlash uchun Akademiyada

o‘qiyotgan turli millat va elat vakillarining milliy urf-odatlari, an‘ana va qadriyatlari keng namoyish etildi.

Bayram tadbirlari davomida hunarmandchilik ko‘rgazmalari, milliy sport turlari bo‘yicha musobaqalar o‘tkazildi. Kitob ko‘rgazmalari tashkil etilib, ko‘klam taomlari tayyorlandi.

Shu bilan birga “Navro‘z” bayrami munosabati bilan 17-18-mart kunlari “Talabalik bahori–2025” festivali o‘tkazildi. Bugungi yoshlarimizning xalqimiz qadimiy urf-odatlari, vatanparvarlikka, ezgulikka va yaxshilikka chorlaydigan folklor chiqishlari, milliy, yakkaxon, turli millatlar raqs ijrochiligi, milliy ommaviy raqqosalar chiqishlari, zamonaviy ommaviy raqs, yakkaxon sozanda, rassomchilik yo‘nalishlaridagi ijrolari barchada yaxshi taassurot qoldirdi.

Festivalda ko‘rik-tanlovlar g‘oliblarini rag‘batlantirish ishlari amalga oshirildi. Xususan, tanlov yo‘nalishlari quyidagilardan iborat bo‘ldi: “Folklor” jamoaviy, “O‘zbek

va jahon estradasi”, “Mumtoz va maqom qo‘shiq ijrochisi”, “Yakkaxon milliy raqs”, “Ommaviy milliy raqs”, “Zamonaviy yakkaxon va ommaviy raqs”, “Suxandonlar”, “Milliy cholg‘uchilik”, “Rassomlik” va hokazo. Shuningdek, “Sumalak sayllari” bo‘yicha talabalar turar joylari o‘rtasida o‘tkazilgan: “Eng yaxshi talabalar turar joyi”, “Eng yaxshi qavat va eng yaxshi xona”, “Eng yaxshi yo‘nalish (ozodalik, ma‘naviyat va ma‘rifat, sport, DND) sardori”, “Eng iboli qiz”, “Eng namunali yigit”, “Xorijdan kelib o‘qiydigan eng namunali talaba”, “Eng fidoiy tarbiyachi pedagog”, “Eng yaxshi tozalik xodimi” tanlov yo‘nalishlari asosida rag‘batlantirildi.

Ha azizlar, azal-azaldan ota-bobolarimiz bahorga pokizalik, yaxshi orzu-niyatlar bilan peshvoz chiqqan. Chunki mehnat, tozalik, saranjom-sarishtalik bor joyda qut-baraka, sihat-salomatlik bo‘ladi.

Oysoat XUDOYOROVA,
tutor

YANGI KUN – NAVRO‘Z MUBORAK!

(Boshi 1-betda)

Navro‘z o‘tmishda qandaydir diniy mazmunga ega bo‘lgan bo‘lishi mumkin, ammo u bugunda bunday mazmundan mahrum bo‘lib, millati, dini, irqi, ijtimoiy maqomidan qat‘i nazar, barcha xalqlarga mansub dunyoparvar insonlarning eng xalqchil ayyomiga aylanib ulgurgan.

Har yili Navro‘z arafasida respublikamizning ko‘plab saxovatpesha insonlari o‘z mehr-muhabbatlari bilan davlat miqyosidagi bir qator xayr-ehson tadbirlarini tashkil qiladilar.

Baayni shayx Jaloliddin Rumiy yanglig‘ butun bashariyatni ardoqlab boshiga ko‘targan Mir Alisher Navoiy “Har tuning

qadr o‘lubon, har kuning bo‘lsin Navro‘z” deganlarida umrimiz xuddi Navro‘z kabi yasharib, yangilanib, ilhomlanib, quyoshlarga to‘liq bo‘lib, tunlarimiz esa Laylat-ul qadr kechasidek Ming oydan barakaliroq bo‘lishini nazarda tutganlar.

Navro‘z – tilaklar mustajob bo‘ladigan ilohiy kun!

Muhtaram Akademiyamiz ahli jamoasi, hamkasabalarim, ustozlarim, ilm toliblari, hammangizni mustaqil yurtimizning eng ulug‘ va eng go‘zal bayrami – Navro‘zi ayyom bilan dildan qutlaymiz, Yangi kun – Yangi yilning ibtidosi hammamizga sharaf va omadlar keltirsin!

Hamidulla MAGZUMOV,
t.f.n., dotsent



*Navro‘z – ezgulik timsoli, yorug‘
orzu-umidlar fasli.*



TTA talabasi Zulfiya nomidagi Davlat mukofoti sohibasi



“MAQSADIM - INSONLAR DARDIGA DARMON BO‘LISH”



Kuni kecha Prezidentimiz jamiyat hayotida faol bo‘lgan 28 nafar xotin-qizni Zulfiya nomidagi Davlat mukofoti bilan taqdirlash to‘g‘risidagi qarorni imzoladi. Ushbu nufuzli mukofot sovrindorlari orasida Toshkent tibbiyot akademiyasining davolash fakulteti 1-bosqich talabasi Saida Abdullayeva ham bor.

Qahramonimiz 2007-yil Samarqand viloyatining Paxtachi tumanida tug‘ilgan. Navoiy shahridagi 11-sonli ayrim fanlar chuqur o‘rganiladigan ixtisoslashtirilgan maktabda tahsil olgan. Aynan shu yerda ustoz Sardor Samadov uning kimyo faniga bo‘lgan qiziqishini sezib, u bilan ko‘proq shug‘ullanishga harakat qildi.

O‘zbekiston terma jamoasi safiga qabul qilingach, ustoz Mohira Boltayeva bilan chuqurlashtirilgan amaliy mashg‘ulotlar soni yanada ortdi. Natijada Saida kimyo olamiga butkul sho‘ng‘ib ketdi.

– Atrofimizdagi barcha narsa va hodisalarga javobni kimyo orqali topish mumkinligini anglab yetdim, – deydi u. – Qolaversa, bu yo‘lda o‘zim uchun juda ko‘p narsalarni kashf qildim. Har bir kimyogarning sevimli joyi bu – laboratoriya. Men uchun ham shunday. Tajribalarim samarasini ko‘rib, xursand bo‘laman. Ustozim Mohira opa kimyoni amaliy tomondan tushunib yetishimga ko‘maklashdi.

Mashg‘ulotlar asta-sekin o‘z samarasini bera boshladi. 2023-yil Xiva shahrida bo‘lib o‘tgan birinchi Abu Rayhon Beruniy nomidagi Xalqaro kimyo olimpiadasida 10-sinf o‘quvchisi bo‘lgan Saida kumush medalni qo‘lga kiritdi.

2023/2024 o‘quv yilida fan olimpiadasining respublika bosqichida 1-o‘rinni egalladi. O‘tgan yili esa Xitoyning Shenjen shahrida o‘tkazilgan 58-Xalqaro Mendeleev olimpiadasi (IMChO)da bronza



medali sohibasi bo‘ldi. Uning 2024-yilda qo‘lga kiritgan yirik yutuqlaridan yana biri Saudiya Arabistonining Ar Riyod shahrida 87 ta davlat (340 nafar o‘quvchi) ishtirokida o‘tkazilgan 56-Xalqaro kimyo olimpiadasi (IChO)da olgan kumush medali bo‘ldi.

Erishgan muvaffaqiyatlari samarasi o‘laroq, Saida Toshkent tibbiyot akademiyasiga imtiyozli ravishda davlat granti asosida o‘qishga qabul qilindi. Aslida kimyo fani unga boshqa ko‘plab kasblarni egallash uchun imkoniyat eshiklarini ochishi mumkin edi. Lekin u aynan shifokorlikni tanladi.

– Bunday qarorga kelishimga o‘z vaqtida hamshira bo‘lib ishlagan buvim sababchi bo‘lganlar, – deydi Saida. – Ular bolaligidan tibbiyot xodimlari odamlarning dardiga darmon bo‘lishini ko‘p bor takrorlardilar. Eng katta orzulari — meni oq xalatda ko‘rish. Shu bois Toshkent tibbiyot akademiyasida o‘qishga qaror qildim.

Qahramonimiz kelajakda endokrinologiya yo‘nalishida malakali shifokor bo‘lmoqchi. Saidaning aytishicha, bunga qandli diabet, qalqonsimon bez kasalliklarining butun dunyoda keng tarqalayotgani va odamlar ulardan aziyat chekayotgani sabab bo‘ldi. Istagi — kelgusida bu xastalikka chalingan insonlarning hayotini yengillashtirish uchun yechimlar topish.

Hozirda Saida fan olimpiadalariga



tayyorlanayotgan tengdoshlariga yaqindan ko‘mak bermoqda. Bu orqali u o‘zi kabi yaxshi natijalarga erishgan yoshlar sonini ko‘paytirishni niyat qilgan.

– Ushbu yuksak mukofotga nafaqat mehnatim, balki davlatimiz rahbarining biz yoshlarga o‘z iqtidorimizni namoyon etish va chuqur bilim olishimiz uchun yaratgan imkoniyatlari, ustozlarim bergan bilimlar va ota-onamning ishonchi tufayli sazovor bo‘ldim, deb hisoblayman. Buning uchun ulardan cheksiz minnatdorman. Qolaversa, bu – ularning ham yutug‘idir, – deydi bo‘lajak shifokor.

Aytish lozimki, Toshkent tibbiyot akademiyasida Saida kabi ulkan yutuqlarga erishib kelayotgan talabalar guruhlari tuzilgan bo‘lib, ular boshqa yoshlarni ham ortidan ergashtirmoqda. Uning maqsadi — bakalavriatni tamomlab, magistraturani rivojlangan chet davlatlarda davom ettirish, ularning ilg‘or tajribalarini o‘zlashtirib, O‘zbekiston tibbiyotini rivojlantirishga o‘z hissasini qo‘shish.

Biz esa maqsadlari aniq va ular sari dadil borayotgan qizga muvaffaqiyatlar tilab qolamiz!

Sog‘liqni saqlash vazirligi
Matbuot xizmati



Yaxshilik va ezgulik yaratish uchun kishi mehnat qilishi, o‘z qo‘llari bilan noz-ne‘matlar yaratishi lozim.



TIBBIYOTNING O'CHMAS IZI...

Tibbiyot fanlari doktori, akademik To'raqulov Yolqin Xolmatovich respublikamizda ham, chet elda ham tibbiyot jamoatchiligining hurmatiga sazovor bo'lgan atoqli biokimyogar olim.



U O'zbekiston biokimyogari fanining asoschilaridan biri, mintaqaviy tibbiyotning shakllanishi va rivojlanishiga katta hissa qo'shgan, hozirgi Respublika ixtisoslashtirilgan endokrinologiya ilmiy-amaliy tibbiyot markazi asoschisi va yuqori malakali o'qituvchi-metodist, faol endokrinolog tayyorlashda jiddiy e'tibor qaratgan jamoat arbobidir.

1947-yilda uni Toshkentga chaqirib, Toshkent tibbiyot instituti (ToshMI) rektori lavozimiga tayinlashdi. O'sha yili u o'ttiz yoshga to'lgandi, ammo hukumat unga bunday yuksak lavozimni ishonib topshirib, yangilashmagandi. Bu yosh iste'dodlar davri edi. Yoshlarga rivojlanish va o'sish uchun katta imkoniyatlar berilardi. ToshMI rahbari sifatida u jamoada ijodiy muhitni shakllantirishga hissa qo'shdi, pedagogik metodikani takomillashtirish va zamonaviy davolash usullarini joriy etish talablarini ilgari surdi. U Moskvada bo'lgan yillar davomida juda ko'p bilim oldi va bu bilimlarini o'z jamoasiga yetkazishga harakat qildi. U institut jamoasini fidoyilik tamoyili asosida shakllantirdi. Mas'uliyatli

rahbar bo'lish bilan birga hech qachon kibr yoki manmanlikka berilmasdi. Oddiy, kamtar, tortinchoq, ochiq va samimiy inson edi. Bo'sh vaqtini esa oilasi, shaxmat va klassik adabiyot mutolaasi bilan o'tkazardi.

Ustoz 1955-yilda Andijon tibbiyot instituti rektori lavozimiga tayinlanadi. Ammo 1957-yil yanvarda Toshkentda Yadro fizika instituti tashkil etilishi munosabati bilan unga radiatsion biofizika laboratoriyasini tashkil etish topshirildi. Bu laboratoriya o'z sohasida dunyodagi eng yetakchi markazlardan biriga aylanadi. Aynan shu yili unga mehnat tibbiyoti laboratoriyasini boshqarish topshirildi. Bu laboratoriya kasalliklar va jarohatlar sabablari bilan shug'ullanib, ayniqsa mahalliy epidemiologiya bo'yicha tadqiqotlar olib bordi. U akademiyaning ilmiy rahbari etib tayinlandi. Bu yerda ilmiy fikrlar qizg'in muhokama qilinar, yosh olimlar nazariy va amaliy tajriba almashinar, seminarlar va ilmiy bahslar tashkil qilinardi. Uning tashabbusi bilan institutda yangi tadqiqot yo'nalishlari ochildi: biokimyogari va biofizika bo'yicha ilmiy ishlar boshlandi. 1957–1963-yillar davomida institutda 80 ta nomzodlik va 19 ta doktorlik dissertatsiyasi himoya qilindi. Uning ilmiy ishlari amaliyotga joriy etildi, yangi ilmiy laboratoriyalarga asos solindi va bu yerdan yetishib chiqqan olimlar keyinchalik boshqa muassasalarda yetakchi ilmiy ishlarni olib borishdi. Uning tashabbusi bilan institutda Bazedov kasalligi (bo'qoq) va qandli diabet bo'yicha yangi ilmiy yo'nalish ochildi. Minglab bemorlar uning ilg'or tibbiy usullari yordamida shu og'ir xastaliklardan forig' bo'lishdi.

Doktorlik dissertatsiyasini 1959-yilda himoya qilib, unda biokimyoviy jarayonlarning sirlarini ochib berdi. Domla ikkita yirik ilmiy va ta'lim muassasasiga rahbarlik qildi va 100 dan ortiq fan nomzodlari va doktorlarini tayyorladi.

Uning so'nggi yirik ilmiy tashabbusi Endokrinologiya institutida neyroendokrinologiya laboratoriyasini tashkil etish bo'ldi. Y.To'raqulov biokimyogari, molekulyar biologiya, endokrinologiya, genetika, fiziologiya bo'yicha 600 dan ortiq ilmiy maqola va 120 dan ortiq ommabop ilmiy-publitsistik asarlar muallifi edi. 50 dan ortiq kitobi va monografiyalari xorijiy tillarga tarjima qilingan. Shu bilan birga ilmiy ishlari AQSh va Isroilda nashr etilgan.

"Biokimyogari" va "Molekulyar biologiya" darsliklari uzoq yillar talabalar uchun asosiy qo'llanma bo'lib xizmat qildi. Shuningdek, "El-yurt hurmati", "Buyuk xizmatlari uchun", "Jasorat", "Shuhrat" ordenlari bilan taqdirlangan. Fanlar akademiyasining eng yuksak mukofoti — "Al-Xorazmiy medali" bilan ham taqdirlangan. Bundan tashqari, u ko'plab boshqa yutuqlarga ham ega bo'lgan.

2005-yilning 1-mart kuni 88 yoshida vafot etgan Y.To'raqulov ajoyib, va sermahsul hayot kechirdi. Bir so'z bilan aytganda o'z xalqining sevimli va hurmatga sazovor farzandi bo'lib qoldi.

Yunusxo'ja YO'LDOSHXON,
Tibbiy va biologik kimyo kafedrasida
katta o'qituvchisi,
Ozodbek MAMASOATOV,
Pediatrya, stomatologiya, xalq
tabobati, tibbiy pedagogika fakulteti
1-bosqich talabasi

GO'ZALLIK VA NAFOSAT BAYRAMI

8-mart – go'zallik va nafosat bayrami Toshkent tibbiyot akademiyasida ham keng nishonlandi. Muqimiy nomidagi musiqali drama teatrida 8-mart – Xotin-qizlar kuniga bag'ishlangan "Sen aziz va muqaddas ayol" deb nomlangan bayram tadbiri tashkil etildi.

Tadbirni akademiya rektori v.v.b Shuhrat Boymuradov tabrik so'zi bilan ochib berdi. So'zga chiqqanlar muhtaram ayollar, professor-o'qituvchilar, Toshkent tibbiyot akademiyasining faxri bo'lmish ziyoli opa-singillar, tibbiyot ravnaqiga munosib hissa qo'shayotgan munis ayollarga iliq tilaklar bildirishdi.



Undan so'ng Akademiya samarali mehnatlari uchun faol professor-o'qituvchilar hamda go'zal va maftunkor ayollar esdalik sovg'alari bilan taqdirlandi.

Shafolat BEKNAZAROVA,
Yoshlar bilan ishlash, ma'naviyat va ma'rifat
bo'limi uslubchisi



*Yaxshilarning suhbatlari – jon rohati,
So'zlari – dard-u alamning ofati.*



1-mart — atoqli shoira Zulfiyaxonim tavallud topgan kun

ZULFIYAXONIM – MATONATNING BUYUK TIMSOLI

Matonat – bu aslida nima? Biz kimlarni matonatli inson deya olamiz? Ajib bir soʻz, ammo zalvorli, keng mushohadali, har kimni oʻylantira oladigan, kerak boʻlsa qalblarni junbishga keltirishga qodir boʻlgan soʻz.

Men Hakimova Shahzoda Bahridin qizi Toshkent tibbiyot akademiyasi talabasiman. Bugungacha bir qancha xalqaro fan olimpiadalari gʻolibasi boʻlganman. 2024-yilda esa fan sohasida erishgan yutuqlarim uchun Zulfiya nomidagi davlat mukofoti sohibasi boʻlganman. Oʻzbek qizi sifatida kundan-kunga davlatimiz va jamiyatimiz uchun munosib kadr, bugungacha oʻzbek qizi, oʻzbek ayoli nomini dunyoga tanitgan qahramon ayollarimiz davomchisi boʻlishga intilaman. Shunday matonat sohiblaridan biri butun bir oʻzbek qizlarining sevimli onasi, ibrat timsoli, oʻrnak maktabi boʻla olgan, sadoqat va vafo kuyini butun hayoti davomida baralla chala olgan shoira Zulfiyaxonimdir.

Darhaqiqat, Zulfiyaxonim har bir oʻzbek qizining ibrat olishga arzigulik namuna maktabi desam mubolagʻa boʻlmaydi. Har qachon Zulfiyaxonim hayoti va ijodi haqida fikr yuritar ekanman xayolimni ajib bir hislar chulgʻab oladi. Bu sabr-qanoat, bardosh va Vatanga muhabbat, oila, farzandlarga mehr, qadriyatlarimizga boʻlgan hurmat kabi tuygʻulardir.

Ana shu matonat timsoli boʻlgan Zulfiya Isroilovaning sheʼriyat, badiiy adabiyot yaʼni sanʼatga kirib kelishi va hozirgi unutilmas mavqega ega boʻlishida onalarining oʻrni juda beqiyos edi. Shoiraning onasi ham adabiyotga qiziquvchan, sheʼrlar va qoʻshiq'larga oshufta qalb onalardan boʻlganligi, bugungi kunda biz oʻzbek xalqiga Zulfiya Isroilova singari zabardast, matonat timsolini kashf etdi desam

adashmagan boʻlaman.

Zulfiya sheʼrlarining xalqchilligi, sodda va chuqur maʼno-mazmunga ega ekanligi uning muxlislari eʼtiborini, mehrini qozondi. Zero, shoira samimiylik va soddalik, oʻzbek xalqiga xos mehr-muhabbat tuygʻularini mahorat bilan tasvirlay olgani hech birimizga sir emas. Shoira Zulfiyaxonim men uchun bahor malikasi kabi, goʻyoki Zulfiya sheʼrlari va bahor fasli uning ajib tarovati birgalikda ajratib boʻlmas goʻzallik, bahor havosi kabi yoqimlilikni baxsh etadi. Zulfiyaxonim sevimli turmush oʻrtogʻi Hamid Olimjondan juda erta ayriladi. Aynan ana shu ayriliq azobi, qalbdagi kemtiklik, sogʻinch hissi shoiraning barcha sheʼrlarida sezilib turadi. Ammo shunday ogʻir yuk ham oʻzbekning matonatli shoirasi qaddini buka olmadi. Shoira endi nafaqat oʻzi balki Hamid Olimjon qalamini ham, oʻz qoʻliga olishga ahd qildi. Ikki inson uchun tinmasdan ijod qildi. Turmush oʻrtogʻi Hamid Olimjon xotirasiga atab sheʼrlar, ocherklar yozdi. Zulfiya Isroilovaning «Bahor keldi seni soʻroqlab» sheʼri oʻz umr yoʻldoshining porloq xotirasiga atab yozgan asarlardandir. Ushbu sheʼr ajoyib tashbehlar bilan Hamid Olimjon xotirasiga, uning oʻchmas hayotiga Zulfiya tomonidan bitilgan dil soʻzlari, qalb alamlari va kechinmalarining, sogʻinch hissining yorqin ifodasidir.

Oʻzbek shoiralari orasida zabardast, matonatli, vafoli yor, mehribon ona timsolini mahorat bilan gavdalantirgan Zulfiyaxonim ijodi, hayoti va kechinmalari har birimizning qalbimizdan chuqur joy olgan va ularga boʻlgan mehr, oshuftalik hissi har bir oʻzbek qizning yuraklarida abadiyga muhrlanib qolishi aniq!

**Shahzoda HAKIMOVA,
TTA talabasi**

OʻZBEK ADABIYOTINING BETAKROR SHOIRA SIYMO SI

Oʻzbek adabiyotining yorqin siymolaridan biri boʻlgan Zulfiya nafaqat Oʻzbekiston, balki butun Sharq adabiyotida oʻzining oʻrni va ahamiyatiga ega ijodkor sifatida eʼtirof etiladi. Uning ijodi Vatani, ona, tabiat, muhabbat va inson qadr-qimmatini kabi ezgu tushunchalarni madh etuvchi betakror sheʼrlardan iborat.

Shoiraning hayoti va ijod yoʻli

Zulfiya Isroilova 1915-yil 1-martda Toshkent shahrida tugʻilgan. U adabiyotga juda erta qiziqib, dastlabki sheʼrlarini maktab yoshida yozgan. 1930-yillardan boshlab uning sheʼrlari matbuotda chop etila boshlagan. Zulfiya oʻz ijodi davomida oʻzbek adabiyotining yetuk vakillaridan biri sifatida tanildi.

Asarlarida Vatanga muhabbat va ayol qiyofasi

Zulfiya ijodida Vatanga boʻlgan muhabbat alohida oʻrin tutadi. Uning «Oʻzbekiston» kabi sheʼrlari yurtga boʻlgan chuqur sadoqat va mehrni aks ettiradi. Shoira oʻz asarlarida ayol siymosini, uning jamiyatdagi oʻrnini katta mehr bilan tasvirlaydi. «Ona» sheʼri esa ona siymosini yuksak darajada madh etgan asarlardan biridir.

Tinchlik va insoniylik gʻoyalari

Zulfiya urush yillarida ham faol ijod qilib, tinchlik va insoniylik gʻoyalarini targʻib etgan. U sheʼrlarida insoniyatni birdamlikka, mehr-oqibatga chorlaydi. Ayniqsa, «Tinchlik haqida qoʻshiq» kabi sheʼrlari insoniyat uchun tinchlik naqadar qadri ekanini taʼkidlaydi.

Shoiraning mukofotlari va eʼtiroflari

Zulfiya oʻzbek adabiyotiga qoʻshgan ulkan hissasi uchun koʻplab mukofotlar bilan taqdirlangan. U Oʻzbekiston xalq shoiri unvoniga sazovor boʻlgan va turli xalqaro adabiy mukofotlarga ham loyiq koʻrilgan. Uning nomi oʻzbek adabiyotining yorqin yulduzlaridan biri sifatida tarix sahifalarida abadiy qoladi.

Zulfiya oʻzining taʼsirchan, samimiy va betakror sheʼrlari bilan oʻzbek adabiyotida chuqur iz qoldirgan. U oʻz asarlarida insoniylik, mehr-oqibat, Vatanga muhabbat va tinchlik gʻoyalarini ilgari surib, oʻzbek sheʼriyatiga yangi nafas bagʻishlagan. Bugungi kunda ham uning sheʼrlari kitobxon qalbini larzaga solib, insoniyatga ezgulik tarannum etishda davom etmoqda.

**Zaxro MIRSAYDOVA,
TTA magistratura Terapiya: xalq tabobati
yoʻnalishi 1-kurs talabasi**



Navroʻz – yangilanish, yangi kun, yangi hayot, poklik va shodlik, maʼnaviyat va birdamlik tantanasi.



Xalqaro hamkorlik

“O‘ZBEKISTON – FRANSIYA” BIRINCHI TIBBIYOT FORUMI: HAMKORLIKNING YANGI BOSQIHI



Parij shahrida “O‘zbekiston – Fransiya” birinchi tibbiyot forumi ikki davlat o‘rtasidagi tibbiyot va sog‘liqni saqlash sohasidagi hamkorlikni yangi bosqichga olib chiqishga qaratilgan.

Forum ochilish marosimida Fransiya Yevropa va Tashqi ishlar vazirligi Iqtisodiy diplomatiya direktori Lyudovik Puye, O‘zbekiston Respublikasi Sog‘liqni saqlash vaziri Asilbek Xudayarov hamda “French Healthcare” assotsiatsiyasi prezidenti Jan-Pyer Boffi qatnashib, ikki davlat o‘rtasidagi tibbiyot sohasidagi hamkorlik istiqbollari

haqida fikr almashdilar.

Tadbir doirasida tibbiy texnologiyalar, innovatsion davolash usullari, kadrlar tayyorlash va ilmiy-tadqiqot hamkorliklari muhokama qilindi. Forum xalqaro hamkorlikni rivojlantirish, tibbiyot sohasidagi ilg‘or tajribalarni o‘rganish hamda O‘zbekiston va Fransiya mutaxassislari o‘rtasidagi aloqalarni mustahkamlashga xizmat qiladi. Mazkur nufuzli tadbirda Toshkent tibbiyot akademiyasi rektori (v.v.b) o‘quv ishlari prorektori Shuhrat Boymuradov ham ishtirok etdi.

XALQARO HAMKORLIK SARI
YANA BIR QADAM

10-12 mart kunlari Parij (Fransiya) shahrida O‘zbekiston–Fransiya tibbiyot forumi bo‘lib o‘tdi. Mazkur forumda Toshkent tibbiyot akademiyasi rektori v.v.b Shuhrat Boymuradov ishtirok etdi.

Forum doirasida onkologiya, tez tibbiy yordam va oliy tibbiy ta‘limda malakali kadrlar tayyorlash masalalari muhokama qilinib, istiqbolli kelishuvlarga erishildi. Tibbiy ta‘limda kadrlar tayyorlash sessiyasida Shuhrat Boymuradov ma‘ruza bilan ishtirok etdi va muhokamalar o‘tkazildi.

Tadbir yakunida Fransiyaning Oliy tibbiy psixomotor rehabilitatsiya instituti bilan hamkorlik shartnomalari imzolandi. Ushbu hamkorlik doirasida magistratura mutaxassislarini tayyorlash, malaka oshirish hamda professor va mutaxassislarni Toshkent tibbiyot akademiyasiga jalb etish rejalashtirildi.

Forumning ikkinchi qismida O‘zbekiston sog‘liqni saqlash vaziri Asilbek Xudayarov boshchiligidagi delegatsiya Parijning eng yirik shifoxonalardan biri – “Hôpital Foch” klinikasiga tashrif buyurdi. 700 o‘rinli ushbu shifoxona onkologiya, bolalar onkologiyasi, gematologiya va patologik kasalliklarni hujayra darajasida target terapiya orqali davolash bo‘yicha yetakchi muassasalardan biri hisoblanadi. Tashrif davomida shifoxona faoliyati bilan yaqindan tanishildi hamda kelajakda kadrlar tayyorlash va tajriba almashish bo‘yicha hamkorlik masalalari muhokama qilindi.

Mazkur forum tibbiyot sohasida xalqaro tajriba almashish va innovatsion yondashuvlarni tatbiq etish uchun muhim platforma bo‘lib xizmat qiladi.

TTA matbuot xizmati

Sport

“VAZIR KUBOGI” SPORT
MUSOBAQASI G‘OLIB
VA SOVRINDORLARI
ANIQLANDI

Toshkent davlat sharqshunoslik universitetida Toshkent shahrida joylashgan oliy ta‘lim muassasalari rektorlari o‘rtasida o‘tkazilgan mini-futbol, stol tennisi va shaxmat bo‘yicha “Vazir kubogi” sport musobaqasining g‘olib va sovrindorlari taqdirlandi.

Tadbir davomida ishtirokchilarning yuqori darajadagi o‘zaro raqobati va jamoaviy qat‘iyati alohida e‘tirof etildi. Mini futbol yo‘nalishida Toshkent tibbiyot akademiyasi rektori v.v.b Sh.Boymuradov 1-o‘rinni egallab, oltin medalni qo‘lga kiritdi! Musobaqa g‘oliblariga “Vazir kubogi”, medallar hamda tashakkurnomalar topshirildi.

Mazkur tadbir kelgusida sport sohasidagi hamkorlik va qo‘shma loyihalarni yanada rivojlantirishga turtki bo‘lib, oliy ta‘lim muassasalari o‘rtasida sportni ommalashtirishga xizmat qilishi qayd etildi.

TALABALAR
LIGASI

Toshkent tibbiyot akademiyasida “Talabalar ligasi” final uchrashuvlari yakunlandi!

Qizg‘in va murosasiz bahslar qariyb 4 oy davom etdi! Ushbu musobaqa davomida talabalar haqiqiy jamoaviy o‘yin va professional futbol hissiyotlarini namoyon etishdi.

Liganing yakuniy jadvali:

1-o‘rin – “Special”

2-o‘rin – “Nihol”

3-o‘rin – “Chinor tibbiyot markazi” jamoalariga nasib etdi.

G‘olib jamoalarni samimiy tabriklaymiz! Musobaqada ishtirok etgan barcha futbolchilar va tomoshabinlarga minnatdorchilik bildiramiz. Ushbu liga faqat g‘oliblarni emas, balki do‘stlik va jamoaviy birdamlikni ham tarbiyaladi.



*Navro‘zi olam – milliy iftixor, o‘zlikni
anglash va hamjihatlik ramzi.*



OLAM NURGA TO'LSIN, SEN BILAN NAVRO'ZI!

Bahor qablarga iliqlik nafasini ulashayotgan ayni damlarda o'lkamizda Navro'zi olam o'z sepini yoymoqda. Yurtimiz uzra, har bir shaharu qishloq bo'ylab uyg'onish ayyomining nafasi hukmron.

Navro'zi olam falsafasi bizning orzu-intilishlarimiz, amaliy ishlarimiz bilan uzviy bog'lanib ketganini bugun har qadamda yaqqol ko'rish mumkin. Xalqimizning oliyjanob mehnati bilan mamlakatimizda yangi-yangi zamonaviy korxonalar, shinam uyjoylar, ijtimoiy va madaniy obyektlar, yo'l va ko'priklar, bog' va xiyobonlar barpo etilmoqda. Yurtimiz qiyofasi kundan kunga obod va go'zal bo'lib bormoqda.

Yasharish, yashnatish ishtiyoqi odamlar qalbiga, shoir ilhomiga, hofiz qo'shig'iga, bobo dehqonlarimiz g'ayratiga g'ayrat, bulbullar navosiga ilhom qo'shmoqda. Mahallaguzarlarimizda obodonchilik yumushlari avjida. Mamlakatimizning har bir go'shasida ro'y berayotgan o'zgarishlar, turmush tarzimizni yanada farovonlashtirish maqsadida hayotga tatbiq etilayotgan islohotlar o'z samarasini berayotgani hech



kimga sir emas. Shunday ekan, bayramlar bizga yarashadi. Azaliy udumlarimiz ramzi, mehr-oqibat timsoli Navro'zi olam tufayli har qancha shodumon bo'lsak, yarashgay. Navro'zda o'tkaziladigan kurash, uloq-ko'pkari, arqon tortish, ot choptirish, merganlik singari milliy sport o'yinlarining zavqi bo'lakcha. Bu o'yinlar qadimdan ajdodlarimiz turmush tarzining ajralmas qismi bo'lib, yosh avlodni jismonan chiniqtirish, salomatligini, irodasini mustahkamlash, ularda or-nomus, halollik, mardlik, vatanparvarlik, bag'rikenglik kabi oliyjanob fazilatlarini shakllantirishda o'rin egallaydi.

Gullab-yashnayotgan O'zbekiston bo'ylab har bir ta'lim maskanlari, istirohat bog'lari, xiyobonlar, mahalla

guzarlari va ko'chalarda Navro'z tantanalari davom etmoqda.

Navro'z bayrami elimizda obodlik, tinchlik-totuvlik, millatlararo ahillik, bag'rikenglik ramzi, qalblarimizda ezgulik uyg'otadigan haqiqiy sharqona bayram bo'lib qolaveradi.

B a y r a m s h u k u h i d a n ko'ngillarga ezgu maqsad yo'lida yangicha kuch-g'ayrat jo bo'ldi. Zero, tabiatdagi yangilanishlar odamlar diliga ham ko'chgani kabi har bir yurtdoshimizning jismida shijoat balqib turibdi. Bu esa o'z-o'zidan ularni yangidan yangi marralar sari undashi tabiiy. Navro'z dasturxonlarimizga to'kinlik, yurtimizga ezguliklarni olib kelsin.

Fotima IRSALIYEVA,
t.f.d, professor

*Bahor fasli senga, so'roqlarim bor,
Nega shoir tilidan tushimas g'azalsan?
Insonlar ko'nglidan xush yoqar ifor,
Ta'rifda tengi yo'q ma'no go'zalsan.*

*Sening visolingga yetmaganlar bor,
Toza qalb egasi diydoringga zor.
Bahramand havongdan lol qolar ta'bim,
Sening iforingdan kuch olar qalbm.*

*Mehr-la, muhabbat rang olar sendan,
Qiyg'os gullar intilar har vaqt.
Qaldirg'och qaytadi seni so'roqlab,
Bahor keldimi, deb charx urib xushvaqt.*

BAHOR FASLI SENGA...



Sarvarbek SOBIROV,
Pediatriya, stomatologiya, tibbiy pedagogika va xalq tabobati
fakulteti 2-kurs talabasi



***Bordi-yu inson hayoti ezgu fikr, ezgu
so'z, ezgu ishlar bilan o'tgan bo'lsa, u
abadul-abad farog'atda yashaydi.***



**TOSHKENT TIBBIYOT AKADEMIYASI QUIYDAGI LAVOZIMLARGA TANLOV E'LON QILADI
(2025-yil mart)**

№	Kafedra nomi	Lavozim, shtat birligi
1-son davolash fakulteti		
1.	Nevrologiya va tibbiy psixologiya	dotsent
2.	1-son travmatologiya va ortopediya	dotsent
3.	Psixiatriya va narkologiya	assistent
4.	Onkologiya	assistent
5.	Klinik modellashirish	assistent
2-son davolash fakulteti		
6.	Anesteziologiya va reanimatologiya	katta o'qituvchi
7.	Tibbiy radiologiya	katta o'qituvchi
8.	Klinik farmakologiya	katta o'qituvchi
9.	2-son travmatologiya, ortopediya, XDX va neyroxirurgiya	assistent
Pediatriya, stomatologiya, xalq tabobati, tibbiy pedagogika va surdotarjimonlik fakulteti		
10.	Reabilitologiya, xalq tabobati va jismoniy tarbiya	assistent
11.	2-son ichki kasalliklar propedevtikasi	katta o'qituvchi
12.	2-son ichki kasalliklar propedevtikasi	assistent
13.	2-son fakultet va gospital terapiya, nefrologiya va gemodializ	assistent
Tibbiy profilaktika va jamoat salomatligi fakulteti		
14.	Gistologiya va tibbiy biologiya	assistent
Farmatsiya, menejment, tibbiy biologiya, biotibbiyot muhandisligi va oliy ma'lumotli hamshira fakulteti		
15.	Biotibbiyot muhandisligi, informatika va biofizika	dotsent
16.	Biotibbiyot muhandisligi, informatika va biofizika	assistent
Malaka oshirish fakulteti		
17.	1-son fakultet va gospital xirurgiya	assistent
18.	Bolalar kasalliklari	katta o'qituvchi
19.	Bolalar kasalliklari	assistent
Xalqaro fakultet		
20.	Tibbiy va biologik kimyo	assistent
21.	O'zbek va xorijiy tillar	o'qituvchi

Hujjatlar tanlov e'lon qilingan kundan boshlab bir oy davomida Toshkent tibbiyot akademiyasining devonxona va arxiv bo'limida qabul qilinadi.

Manzil: Olmazor tumani, Farobiy ko'chasi, 2-uy.

Toshkent tibbiyot akademiyasi rektorati, Kasaba uyushmasi Nevrologiya va tibbiy psixologiya kafedrasini professori
Asatullayev Maqsud Mahmudovichga ukasi
Marat ASATULLAYEVni
vafoti munosabati bilan chuqur ta'ziya izhor etadi.

**MUASSIS:
TOSHKENT
TIBBIYOT
AKADEMIYASI**

**MUHARRIR
TURDIQUL
BOBOMURATOV**

TAHRIR HAY'ATI:
Q.Nizomov (Bosh muharrir o'rinbosari),
O.Hazratov, A.Zohidiy, N.Hakimova,
L.Abduqodirova, M.Hasanova

Gazeta Pentium-IV
kompyuterida sahifalandi va Toshkent
Tibbiyot akademiyasi RIZOGRAFda
400 nusxada chop etildi.
Manzilimiz:
Toshkent shahri, Farobiy
ko'chasi, 2-uy
Nashr uchun mas'ul
Q.Nizomov

Gazeta Toshkent Matbuot va axborot
boshqarmasida 2007-yil 15-yanvarda
02-0049 raqam bilan ro'yxatga olingan

Mualliflar fikri tahririyat nuqati nazaridan farqlanishi
mumkin. Maqolalardagi ma'lumotlar uchun
mualliflar javobgardir
Bepul tarqatiladi